

初中學生文庫

註釋分級古文讀本

甲編三

編者 呂佩芬 註釋者 劉傳厚

中華書局編印

註釋分級古文讀本

甲編三

柳玘致戒高門舊唐書

柳玘〔一〕著書誠子弟曰：『夫門地高者，〔二〕可畏不可恃也；可畏者，立身行己，一事有墜先訓，則罪大於他人，雖生可以苟取名位，死何以見祖先於地下？不可恃者，門高則自驕，族盛則人所嫉；實蕤懿行，人未必信，纖瑕微累，十手爭指〔三〕矣。所以承世胄〔四〕者，修己不得不至，爲學不得不堅也。』

〔一〕柳玘，唐仲郢子，由書判拔萃，轉左補缺。

〔二〕門地，猶門第。「門第高者」，謂世爲仕宦之家。

〔三〕「十手爭指」，謂指摘尋釁之人多也。

〔四〕世胄，猶言世家，卽世代仕宦之家也。

劉君良四世同居唐書

劉君良〔一〕四世同居，族兄弟〔二〕

猶同產也。斗粟尺帛無所私。隋大業末，〔三〕荒饉，妻勸其異居，乃竊易置庭樹烏雛，令鬪且鳴。家人怪之，妻曰：「天下大亂，禽鳥尚不相容，況人乎？」君良從之。月餘，方知其計，中夜攬妻髮大呼曰：「此卽破家賊耳。」召諸昆弟，哭以告之。是夜棄其妻，更復同居，情契如初。

〔一〕劉君良，唐饒陽人。

〔二〕族兄弟，同姓之親，自三從以外，皆稱爲族；如族伯叔，族兄弟。

〔三〕隋，朝代名。隋文帝楊堅始受封於隋，後受北周禪爲帝，旋又滅陳統一中國。以「隨」從「辵」，周齊奔走不寧，故去「辵」作「隋」卽以爲國號。大業末，謂隋煬帝大業十二年。

何曾閨門整肅晉書

何曾〔一〕閨門〔二〕整肅，自少及長，無聲樂嬖幸之好。年老後，與妻相見，皆正衣冠，相待如賓。已南向，妻北面，再拜上酒，酬酢〔三〕既畢，便出一歲如此，不過再三焉。嘗侍武帝〔四〕宴，退告其子遵等曰：『國家應天受禪〔五〕，吾每宴見，未聞經國遠圖，惟說平生常事，非貽厥孫謀〔六〕之兆也；及身而已。後嗣其殆乎？』

〔一〕何曾，字穎孝，好學博聞。

〔二〕閨門，內室之門也，指私室而言。

〔三〕酬酢，謂主賓勸酒也。

〔四〕武帝，即晉武帝，姓司馬，名炎。

〔五〕應天受禪，謂應天命而受帝位也。

〔六〕貽厥孫謀，謂遺留子孫以謀畫。

梁鴻與妻偕隱後漢書

梁鴻〔一〕聘同縣孟氏女。〔二〕及嫁，始以裝飾入門，七日而鴻不答。妻乃跪牀下請罪。鴻曰：『吾欲裘褐〔三〕之人，可與俱隱深山者爾。今乃衣綺縞，〔四〕傅粉墨，豈鴻所願哉？』妻曰：『以觀夫子之志耳。』乃更爲椎髻，〔五〕著布衣，操作而前。鴻大喜曰：『此眞梁鴻妻也，能奉我矣。』乃共入霸陵〔六〕山中，以耕織爲業。

〔一〕梁鴻，字伯鸞，東漢平陵人。家貧尙節。

〔二〕孟氏女，卽孟德耀，名光。

〔三〕褐，粗布之衣，賤者之服也。

〔四〕綺卽今之綾，縞卽白色生絹。

〔五〕椎髻，一撮之髻，其形如椎。

〔六〕霸陵，在今陝西西安市東。

鄧禹子各守一藝 後漢書

建武〔一〕十三年，天下平定，〔二〕諸功臣皆增戶邑，定封鄧禹〔三〕爲高密侯，食高密、昌安、夷安、淳于四縣，以時進奉朝請。〔四〕禹內文明，篤行淳備，事母至孝。天下既定，常欲遠名勢。有子十三人，各使守一藝，修整閨門，教養子孫，皆可以爲後世法。資用國邑，不修產利，帝益重之。

〔一〕建武，東漢光武帝年號。

〔二〕天下平定，謂討平諸叛賊，統一中國。

〔三〕鄧禹，字仲華，東漢新野人。光武常與定計畫，

以前將軍持節入關，名震關西。拜大司徒，爲

中興功臣第一。

〔四〕漢時外戚及將軍公卿列侯，多奉朝請。奉朝請者，奉朝會請召而已。

仇覽正己及民後漢書

仇覽〔一〕一名香，雖在宴居，〔二〕必以禮自整。妻子有過，輒免冠自責。妻子庭謝，候覽冠，乃敢升堂。家人莫見其喜怒聲色之異。嘗爲蒲亭長。人有陳元者，其母詣〔三〕覽告元不孝。覽驚曰：『當是教化未及至耳。』乃親到元家，與其母子飲，因爲陳人倫孝行，譬以禍福之言。元卒成孝子。

〔一〕仇覽，後漢人。

〔二〕宴居，即獨處也。

〔三〕詣，至也。

疏廣不增產業 漢書

疏廣歸鄉里，〔一〕日設酒食，與族人賓客相娛樂。或勸廣爲子孫頗立產業者。廣曰：「吾自有舊田廬，令子孫勤力其中，足以共衣食，與凡人齊。〔二〕今復增益之，以爲贏餘，但教子孫怠墮。〔三〕耳。賢而多財，則損其智；愚而多財，則益其過。且夫富者，衆之怨也。吾旣無以教化子孫，不欲益其過而生怨也。」

〔一〕疏廣，漢東海蘭陵人。漢宣帝時爲太子太傅。

兄子受，仕至太子少傅。廣謂受曰：「知足不辱，知止不殆。宦成名立，如此不去，懼有後悔。」

遂歸鄉里。

〔二〕「與凡人齊」即謂與常人同也。

〔三〕怠墮，即怠惰。墮爲惰之假借字。

越農人種稻獲贏〔一〕郁離子〔二〕

鄭之鄙人，學爲蓋〔三〕，三年而大旱，無所用；棄而爲桔槔〔四〕，三年而大雨，又無所用；則還爲蓋焉。未幾盜起，民盡戎服〔五〕，鮮用蓋者，欲學爲兵，則老矣。越有善農者，鑿田〔六〕種稻，三年皆澇〔六〕。人謂宜洩水樹黍〔七〕，弗對，而仍其舊。乃大旱連歲，計其獲，則償所歉而贏焉。故曰：「旱斯具舟，熱斯具裘。」〔八〕天下名言也。

〔一〕郁離子，明劉基撰。

〔二〕蓋，卽雨傘。

〔三〕桔槔，井上轆轤，所以取水者。

〔四〕戎服，卽軍服。

〔五〕鑿田，卽墾田也。

〔六〕澇，音勞，去聲。雨水過多也。

〔七〕黍，北人呼爲黃米子；樹黍，謂改種稻爲種黍。

〔八〕謂旱天須預具舟楫，熱天須預製裘衣。

華覈禁奢勸織三國志

孫皓〔一〕時，民貧俗奢，婦人爲綺靡之服，〔二〕不勤麻枲。〔三〕華覈〔四〕上疏曰：「今吏士之家，子女多者三四，少者一二。通令〔五〕戶有一女，十萬家則十萬人；人織績，一歲一束，則十萬束矣。數年之間，布帛必積，恣民五色，〔六〕惟所服用。若綺繡之飾，有之無益，廢之無損；何愛而不禁乎？此富國之本業也。」

〔一〕孫皓，三國時吳之末主，孫權之孫，國亡後，降晉，封歸命侯。

〔二〕「綺靡之服」，卽綢綾奢靡之服。

〔三〕「不勤麻枲」，謂不能勤織麻枲，以生產富國也。

〔四〕華覈，字永先，吳郡武進人。

〔五〕通，卽是統計，令假使也。

〔六〕「恣民五色」，謂任民染以五色。

樊重上下戮力後漢書

樊重〔一〕世善農稼，好貨殖。〔二〕其
營理產業，物無所棄；課役童隸，〔三〕各
得其宜。故能上下戮力，財利歲倍。開
廣田土，三百餘頃；池魚牧畜，有求必
給。嘗欲作器物，先種梓漆，時人嗤之。
然積以歲月，皆得其用，向之笑者，咸
求假焉。貲至巨萬。而振贍宗族，恩加
鄉閭。縣中稱美，推爲三老。〔四〕

〔一〕樊重，字君雲，後漢湖陽人。

〔二〕好貨殖，好用貨財生殖也。

〔三〕童隸，即童僕也。

〔四〕三老，鄉官掌教化者。漢初有鄉三老，縣三老，
之名目。

龔遂善治渤海 漢書

渤海〔一〕左右郡，歲饑，盜賊並起，二千石〔二〕不能禽制。宣帝以龔遂〔三〕爲勃海太守。遂見齊俗奢侈，好末技，不田作，〔四〕乃勸民務農桑，令口種一樹榆，百本薤，五十本葱，一畦韭；家二母彘，五雞。民有帶持刀劍者，使賣劍買牛，賣刀買犢，曰：「何爲佩牛帶犢？」勞來循行，〔五〕郡中皆有蓄積，獄訟止息。

〔一〕渤海，郡名，漢置，今河北河間縣以東至滄縣，

北至東安文安，南至山東之海豐，皆其地。

〔二〕漢太守秩二千石，因以二千石爲太守的替

代詞。

〔三〕龔遂，漢山陽人，宣帝時爲渤海太守。

〔四〕「不田作」，謂不務農也。

〔五〕「勞來循行」，謂慰勞招致，撫綏巡閱也。

任氏儉以致富史記

宣曲〔一〕任氏之先，爲督道倉吏。
秦之敗也，豪傑爭取金玉，而任氏
獨窖〔三〕藏粟。楚漢相距滎陽，〔四〕民不
得耕種，米石至萬，而豪傑金玉盡歸
任氏，任氏以此起富。富人奢侈，而任
氏折節〔五〕爲儉，力田畜。其家約，非田
畜所出，弗衣食；公事不畢，則身不得
飲酒食肉。以此爲閭里率，故富而主
上重之。

〔一〕宣曲，高祖功臣，有宣曲侯。

〔二〕督道倉吏，官名；卽監督倉庫之官。

〔三〕窖，音告，去聲；穴地藏物也。

〔四〕楚指項羽；漢指劉邦。滎陽，今屬河南開封，楚

漢時相距於此。

〔五〕「折節」謂謙讓不爭居人上也。

張安世家富霍光漢書

張安世以父子封侯，〔一〕在位太盛，乃辭祿不受，詔都內〔二〕別藏張氏無名錢，以百萬數。安世雖尊爲公侯，食邑萬戶，然身衣弋綈，〔三〕夫人自紡績，家童七百人，皆有手技作事。內治產業，累積纖微，是以能殖其貨，富於大將軍光。〔四〕天子甚尊憚大將軍，然內親安世，心密於光焉。

〔一〕安世，漢杜陵人。父湯，武帝時拜大中大夫。安

世在宣帝時，以定策功，封富平侯，子孫相繼爲侍中，中常侍、諸曹、散騎、列校尉者十餘人。

〔二〕都內，主簿也。

〔三〕弋綈，黑色之厚繒也。「身衣弋綈」言其樸素。

〔四〕光，卽霍光。光族黨滿朝，權傾內外，故天子尊憚之。

白圭善治生產史記

白圭〔一〕樂觀時變，人棄我取，人取我予。能薄飲食，忍嗜欲，節衣服，與用事僮僕同苦樂；趨時若猛獸，鷙鳥之發。故曰：『吾治生產，猶孫吳〔二〕用兵，商鞅〔三〕行法也。其智不足與權變，勇不足以決斷，仁不能以取予，彊不能有所守，雖欲學吾術，〔四〕終不告之矣。』蓋天下言治生者祖白圭。

〔一〕白圭，周人。

〔二〕孫吳，卽孫武、吳起，用兵之最精者。

〔三〕商鞅，戰國時法家，衛人。爲秦王變法圖強。

〔四〕術，謂治生之術。

范蠡居陶致富史記

范蠡〔一〕耕於海畔，父子治產，致數千萬。齊聞其賢，以爲相。歎曰：『居家致千金，居官致卿相，此布衣之極；久受尊名，不祥。』乃歸相印，盡散其財，閒行以去。止於陶，〔二〕以爲此天下之中，交易之路通，爲生可以致富。於是自謂陶朱公，父子耕畜，候時轉物，〔三〕逐什一之利。居無何，貲累巨萬，天下稱陶朱公。

〔一〕范蠡，春秋楚人，仕越，助越王句踐滅吳。後浮

海入齊，變姓名爲鴟夷子皮。治產三致千金，

再分散之。居陶，自號陶朱公。

〔二〕陶，在今山東肥城。

〔三〕轉物，謂轉運物貨。

王旦儉約率下宋名臣言行錄

王旦^{〔一〕}儉約率子弟。每見家人服飾稍過，卽瞑目曰：「吾門素風，^{〔二〕}一至於此！」亟令減損。有貨玉帶^{〔三〕}者，弟以爲佳，旦命繫之，曰：「還見佳否？」弟曰：「繫之安得自見？」旦曰：「自負重而使觀者稱好，無乃勞乎？」亟還之。平生所服，止於賜帶。^{〔四〕}又不置田宅，曰：「子孫各當念自立，何必田宅？徒使爭財爲不義耳。」

〔一〕王旦，字子明，宋大明人。真宗時，知樞密院，當

國最久。

〔二〕素風，謂樸素之風也。

〔三〕玉帶，自明朝以前，官僚之禮服，有玉帶繫在

腰間。

〔四〕賜帶，卽朝廷君主賜臣下之玉帶。